

Bën cinch i cumëmbri nueves

Nstadi iel stat la senteda generela dla Grupa Bal populer de Sëlva y S. Cristina. Uneranzes y vela dl cunsëi nuef



La Grupa Bal populer de Sëlva y S. Cristina.

Lies - N venerdì ai 13 de jené se à la Grupa ancuntà per la senteda generela tl local dla proes te Cësa de Cultura "Oswald von Wolkenstein". Dlongia l cunsëi y i cumëmbri dla Grupa, fòvel nce prejënt l cumëmber d'unëur Bruno Riffeser.

L president Julian Stuffer à saludà duc y cuntà dl'atività dl ann passà. De ndut ons fat set ejibizons, fat pea pra cin' defiledes, jic cater iedesc a cianté la tlecanoht, fat 19 proes de balé y sies

proes de plattler. Oradechël se ons mo ancuntà ot iedesc per s'la dé bona y se devertì.

Uneranzes ai cumëmbri

Do chësc ressumé à l president premià i cumëmbri plu lezitënc tl ann 2016: Anna Demez, Christian Rabanser y Diego Coleselli. Christian Rabanser y Diego Coleselli à n chësta sëira cun gran legrëza nce pudù pië

do l'odla de recunescimënt y diplom di diesc ani de atività pra la Grupa Bal Populer. N cumplimënt y na lauda per l gran mpëni ai cumëmbri che ie unii unerei.

Cumëmbri nueves

N ucajion de chësta senteda generela ie i cin' cumëmbri nueves unii tëuc su ufizialmënter: Nancy Kasslatter, Anna Moroder, Vera

Mussner, Georg Ellemunt y Romina Runggaldier. Doves de chësta mutans ie bele la segunda generazion che fej pert dla Grupa Bal Populer. Nsci pössen di che la pascion per l bal y la mujiga populera pra nosta grupa vën data inant tla generazions.

La parola al cumëmber d'unëur Bruno Riffeser

Do chësc à l cassier Andreas

Comploi purtà dant i conc dl 2016 y l cumëmber de unëur Bruno Riffeser à tëut la parola. Èl à dantaldut lauda la grupa per la gran atività y mutivazion y dit cie che ti sta a cuer.

Coche cumëmber de unëur ie èl for na stiza per la grupa y sà da dé de bon cunsëies. Èl nes conta cosses nteressantes y da rì de coche la fova ntlëuta canche la Grupa ie unida metuda su tl 1983.

Veles dl cunsëi nuef

Sun l program fòvel nce la veles dl nuef cunsëi. Coche president iel stat cunfermà cun la gran maiuranza Julian Stuffer; maester de bal ie da sën inant Christian Rabanser, cun Veronika Piazza coche vize. Dl vedl cunsëi ie unii cunfermei Julian Stuffer, Christian Rabanser, Andreas Comploi y Andreas Delago. Nueves tl cunsëi ie Vera Mussner, Alexia Comploi y Diego Coleselli. L ne fej nia plu pert dl cunsëi: Heidi Perathoner, Anna Demez (che se cruzierà inant di guanc) y Matthias Weithaler. N gran ringraziamënt ti va ai cumëmbri dl vedl cunsëi, dantaldut al maester de bal da dant Matthias Weithaler, che à lascià te si ncëria. Ala fin dla senteda iel mo unì mustrà de bela fotografies dl'ativiteies dl ann 2016 y giaurì l buffet per sté mo mpue' deberieda a s'la ciaculé.

Per l ann che vën ons inò na bela y gran atività sun l program, chëla ulessan nvië a fé pea duc i jëuni che ulëssa mparé a balé y sté deberieda te na blòta cumpania.

Per la Grupa Bal Populer,
Andreas Delago y Anna Demez